


TEZAU LITURGIC
23 IANUARIE

SLUJBA
SF. MUCENIC
AGATANGHEL
DE LA ANCIRA



MOSCOVA, 2000



Мѣсяца ианнуариа в 23-й день

Служба Мч. Агафангела

На велицей вечерни

Блажен муж: 1-й антифон.

На Господи, возвах: стихирьы, глас 6.

Подобен: Тридневен:

Ликуй ныне, мучениче всеславне, / кровьми
своими пламень многобожия угасивый / и
венцем бессмертия славно увенчанный, /
Агафангеле пречудне, Церкви утверждение, /
похвало и радование людем православным, // и
предстателю теплейший о душах наших.

Ликуй, ныне, страсотерпче блаженне, / во
уметы вменивый демонския злочестивыя
дерзости / и во благочестии сердце утвердивый
/ и за Господом даже до смерти последовавый, /
Агафангеле преславне и досточудне, // моли
Христа Бога о воспевающих ныне святую
память твою.

Всекраснейшее Церкви Христовы украшение, /
Ангелом благим соименна, / Агафангела
приидите возславим, / той бо страданьми

своими вселенную украсил есть / и уставил есть
кровей своих течением токи страстей, / темже
венцем небесным украсися славно, / и ныне
пред престолом Божиим предстояще, // присно
молит о воспевающих святую память его.

Ины стихиры, глас 4.

Ко страдем всерадостно возшедшаго / и крест
мучения на рамена своя подъявшаго, / придите
воспоим Агафангела всеславнаго, / той бо не
устрашися безбожнаго прещения, / но
нечестивым царем и владыкам обличитель явися
вседоблественнейший, / темже, воспевающе его,
/ радостно глаголем: // радуйся, молитвенниче
вселавный о душах наших.

Колесницею мучений на небеса преславно
возшел еси, / страстотерпче и мучениче
предивный, / и подвигом добрым веру
запечатлел еси, / Агафангеле досточудне и
всеблаженне, / темже со лики ангельскими
Престолу Божию предстоя, // моли непрестанно
о верою тя воспевающих.

Огнем ревности Божественныя разженный, /
безбоязненно предстал еси пред судищем
нечестивым / и кротостию своею посрамил еси
гордыню безбожных, / и крепостию сломил еси
державу крепкую, / Агафангеле мучениче

всеблаженне, / венец страстей от Господа
приявый, / моли непрестанно
Подвигоположника Спаса, / да укрепит нас во
благочестии и доброделании, / да ходатайством
твоим укрепляеми // достигнем Невечерняго
Царствия Божия.

Слава, глас 6:

Грядите людие, / принесем песнь подвижнику
дивному, / Агафангелу твердому и богомудрому,
/ яко жертву непорочную себе Агнцу Божию
принесшему / и на пир небесный радостно
возшедшему, / лики ангельскими терпением
своим удивившему / и всезлюбныя силы адския
отгоняющему / и сему усердно возопим: /
вознеси молитву, предоблественнейше, / да
помилет Господь люди Своя, / во благочестии
нас укрепляюще // и подающе присно велию
милость.

И ныне, Богородичен: Кто Тебе не ублажит:

Чтения мученические три.

На литии стихира, глас 8.

Подобен: О, преславнаго чудесе:

**О, преславнаго чудесе, / яко звезда светоносная
/ возсия днесь память твоя блаженне, / и**

прелести мрак отгоняется / и верныя радости
божественныя причащаются, / память
совершающе Агафангела всечуднаго, //
молитвенника преславнаго о душах наших.

Слава: глас 2:

Не возжелал еси шествовати на совет
нечестивых / и на пути грешников не стал еси /
и посреде седалища развращеннаго пребывания
избегл еси, / темже блаженство вечное
уготовися ти, Агафангеле достоблаженне, /
мужества образе и чистоты воистину сокровище
всеславное, // моли Христа Бога спастися
душам нашим.

И ныне, Богородичен, глас тойже:

Единосущное Слово Отчее, / бытие всей твари
подающее, / содела Тя, Богоблаженная, /
чистую Свою Матерь, // Жизнь миру
источившую.

На стиховне стихиры, глас 4:

Утверждено о Господе имеяй сердце свое, /
Агафангеле мучениче преславне, / на лодию
страстей возшел еси, / и преплывше море
бурное мира сего, / достигл еси необуреваемого
пристанища Христова, / темже ныне в

незаходимей сияеши славе, // моли непрестанно
о воспевающих память твою.

Стих: Праведник яко финикс процветет, / яко
кедр, иже в Ливане, умножится.

Процвел еси яко финикс досточудне, / рукою
Климентя блаженнаго всажденный / при
исходищих вод глаголов Божиих, / и цветы
подвигов твоих вселенную всю облагоухал еси, /
Агафангеле всеславне, // моли Христа Бога
спастися душам нашим.

Стих: Насаждения в дому Господни, / во дворех
Бога нашего процветут.

Беззаконнии, безумнии, – / глагола еси
мучениче нечестивым, – / почто мя муки
различными устрашаете / и страсти
злострашныя составляете, / ничто мя возможет
отлучити от любве Божия, / мир Возлюбльшаго
и за нас Себе на страсть предавшаго / и
смертию Своею смерти державу разрушившаго
// и просвещающаго всякаго человека
грядущаго в мир.

Слава, глас 1:

Воспеваеши Господеви песнь нову, / во славе
предстояще престолу Господню, / мучениче
всечестне Агафангеле, / купно со всеми

святыми, / ризы своя кровию Агнца Божия
убелившими / и Его ради страдания
приимшими, / и молитву Господу приносящими
// во еже спастися всем нам.

И ныне, Богородичен, глас тойже:

Се исполнися Исаино проречение:

Тропарь, глас 4.

Мученик твой, Господи, Агафангел, / во
страдании своем венец прият нетленный от
Тебе, Бога нашего; / имей бо крепость Твою, /
мучителей низложи, / сокруши и демонов
немошныя дерзости, / того молитвами // спаси
души наша.

НА УТРЕНИ

По первом стихословии седален, глас 4:

Радуйся, вселадкий грозде Лозы благоплодная,
наставленьми святителя Климента напоенный и
во дворех Вседержителя благодатию Божиею
всажденный, сладости истиннаго богопознания
исполненный, Агафангеле мучениче
треблаженне, моли непрестанно о всех нас.

Слава, И ныне, Богородичен, глас тойже:

Радуйся, необоримая Предстательнице христиан и Прибежище, радуйся, Владычице всепетая, радуйся, Упование наше крепкое, радуйся, Невесто Невестная.

По втором стихословии седален, глас 8:

Судищу предстояще неправедному, Истину испостасную исповедал еси и Праведному Судии себе предав, яко агнец непорочен и чист в жертву вольную Агнцу Божию себе принесл еси, Агафангеле преславне, темже молитвою твоею во Православии всех нас утверди.

Слава, И ныне, глас тойже:

Отчаго лона не оставль, во утробу Твою, Пречистая, вселился ест Христос Бог, Ему же пение и мольбы возсылающе, Тя, Богородице, присно ублажаем.

По полиелее седален, глас 8:

Страстьми твоими уязвил еси / богомерзкую гордыню лукаваго человекоубийцы древняго / и нечестивых посрамил еси дерзновение вселестнейшее, / и мучение радостно за Христа приял еси, / Агафангеле страстоносче преславне и досточестне, // моли непрестанно о славящих память твою.

Слава, И ныне, Богородичен, глас тойже:

Теплая Предстательнице и непобедимая, /
Упование известное и непостыдное, / Стено и
Покрове и Пристанище прибегающих к Тебе, /
Приснодево Чистая, / Сына Твоего и Бога моли,
// умирение дати миру и спасение и велию
МИЛОСТЬ.

По 50 псалме, стихира, глас 6:

Днесь вселенная вся торжествует, / воспевающе
псалмы и песни духовныя / и память
совершающе Агафангела славнаго, / терпением
своим побеждающаго демонов полки / и веру
православую утверждающаго, // и нас
озаряющаго предстательством своим.

Канон, глас 4,

его же краегранесие: Приими мое пение,
мучениче всеславне.

Песнь 1

Ирмос: *Отверзу уста моя и наполнятся Духа
и слово отрыгну Царице Матери и явлюся
светло торжествуя и воспою, радуясь, Тоя
чудеса.*

Отверзу уста моя недостойная и вознесу похвалу Господу, на святых Своих мученицех почивающему и венцем небесным венчающему ныне Агафангела достославнаго.

Приими, мучениче, недостойных устен пение немощное и молитвою твоею укрепи прославляющих тя, Агафангеле достославне.

Ризы своя убелил еси кровию Агнца Божия, грехи мира взявшаго, и тому последовал еси вседоблественно, Агафангеле достославне.

Богородичен: Избранныя всадники тристаты потопи древле в Чермнем мори и грехи мира потопи Кровию Своею, из Тебе без семени Воплотившийся Христос Бог, Богородице всепетая.

Песнь 3

Ирмос: *Твоя песнословцы, Богородице, живый и независтный источниче, лик Себе совокупльшыя духовно, утверди, в божественней Твоей славе венцев славы сподоби.*

Идольскую суету отвергнул еси и избрал еси благочестия путь и святыни, Агафангеле мучениче и страстоносче, во еже присно воспевати: Свят еси, Господи.

Мудрости вышняя учениче и последователю неленостный являешия и подвигом твоим вся научаеши Благих Подателя воспевати: Свят еси, Господи.

Истину Ипостаcтную возлюбил еси и отбежал еси тмы вселестнейшия и злобы нечестивыя, темже присно купно с лики ангельскими воспеваеши: Свят еси, Господи.

Богородичен: Мати всепетая, Дево Богородице, милостию Твоею вся заступи, да поем непрестанно Сына Твоего и Бога нашего, глаголюще: Свят еси, Господи.

Седален, глас 5:

Бурею всеяроcтною искушений и страстей потщася враг вселукавый погубити тя, избранниче Христов, ты же адамант твердый веры Православныя показался еси и ко спасению наставник явился еси всем.

Слава, И ныне, Богородичен, глас тойже:

Моление теплое вознеси, Мати всепетая, и покровом Твоим всечестным от всякаго зла избави люди Твоя, Богородице Владычице.

Песнь 4

Ирмос: *Седяй в славе на Престоле Божества во облаце легце, прииде Иисус Пребожественный нетленною дланию и спасе зовущия: слава, Христе, силе Твоей.*

Огнем словес евангельских Климент досточудный ражже сердце твое, мучениче треблаженне, имже освети и сердца нас, память твою верно совершающих.

Еленю тщащемуся ко источником водным уподобися душа твоя, возжелавшая к Богу крепкому, страстотерпче блаженне, темже во правоверии и крепости и нас утверди, память твою верно совершающих.

Пастырю Божественному, душу Свою за овцы Своя положившему, последовал еси и, не убоявшеся тело убивающих, неврежденно соблюл еси душу безсмертную, темже молитвою твоею от бед избави всех, память твою верно совершающих.

Богородичен: **Елеем** молитв Твоих, Владычице Всепетая, исцели страсти душ наших и от всякаго зла избави люди православныя, милости Твоя верно воспевающия.

Песнь 5

Ирмос: *Ужасошася всяческая о Божественней славе Твоей: Ты бо Неискусобрачная Дево, имела еси во утробе над всеми Бога, и родила еси Безлетнаго Сына, всем воспевающим Тя, мир подавающая.*

Нечестивыя обличил еси и за Христа страсти приял еси, мучениче достоблаженне, имже попрад еси безумство мучителей безбожных и Церковь свободил еси от гонителей скверных, молитвами твоими мир Божий водворяющи.

Ирода древняго подражатели, нечестивейшии и безбожнейшии гонителие Домициан и Диоклетиан, Агриппин и Курикий, Домиций и Максимиан купно со Сакердонием злобным, реку кровей мученических пролияти потщашася, яже семенем христианским является и зарею царствия новаго, мир нерушимый Церкви подающаго.

Естества законы превозмогающи, мучения многоразличныя и казни лютыя претерпел еси, терпением своим безплотныя лики удивляюще, Агафангеле отче, темже молитвами твоими ниспосли нам от Господа благодать и мир нерушимый.

Богородичен: **Милости** **Источниче**
всебогатый, ущедрѣ нас, да прославим Тя, Дево
Чистая, предстательством Твоим мир небесный
нам дарующую.

Песнь 6

Ирмос: *Божественное сие и всечестное,
совершающе празднество, богомудрии
Богоматере, приидите руками восплецим, от
Нея рождшагося Бога славим.*

Утробу **Девичу** **рождеством** **Своим**
благословивый, **благослови** **тя,** **мучениче**
вседоблественнейший, и к подвигу всеславному
тя призва, и главу твою увенча венцем
спасения.

Чисто **соблюл** **еси** **сердце** **твое,** **мучениче**
всеславне, и узрел еси Господа и Владыку, на
подвиг крестный ты призывающаго и врата
небесныя ты любовию отверзающаго, и
венчающаго ты ныне венцем спасения.

Ехидново **порождение,** **чада** **осуждения,** **почто**
мучения **новыя** **составляете,** **почто** **тщитесь** **от**
Господа **страстерпца** **разлучити,** **во** **броня**
правды **облеченного** **и** **от** **Подвигоположника**
увенчаннаго **венцем** **спасения.**

Богородичен: **Н**овый Ковчег благодати и Стамну, Хлеб жизни носящую, Лествицу Небесную и Гору несекомуую, Врата непроходимая и Руно благоорошенное, прообразуя, возвестиша тя пророцы вси, темже, Владычице, на врага завистника во брани укрепи и рабом твоим подаждь венец спасения.

Кондак, глас 2:

Звезда светлая явился еси, непрелестная
мирови, / Солнце Христа возвещаючи, /
зарями твоими, страсотерпче Агафангеле, / и
прелесть погасил еси всю: / нам же подаеши
свет, // молящися непрестанно о всех нас.

Икос.

Жизнь моя – Христос и смерть мне
приобретение есть, – глагола еси мучениче
пребезумным, – темже не устрашуся, ниже
убоюся страсти ради Господа, страстию Своею
врата ада Поправшаго и воскресением Своим и
мне воскресение Дарующаго, и к подвигу
мученическому мя ныне Призывающаго. Сего
ради, мучениче вседоблественный, моли
непрестанно о всех нас.

Песнь 7

Ирмос: *Не послужиша твари богомудрии паче Создавшаго, но огненное прещение мужески поправше, радовахуся поюще: прпетый отец Господь и Бог благословен еси.*

Иерусалима Небеснаго достигл еси отче, на колесницу возшед мучений, и озарился еси светом невечерним, Престолу Божию предстояще и радостию воспевающе: отец и наш Боже, благословен еси.

Чистоты сокровище и веры адаманте, Агафангеле всеславне посрамил еси гордыню нечестивых и победил еси полки демонския, посреде мучений вопиюще: отец и наш Боже, благословен еси.

Един Сый Безсмертный, укрепивый древле отроки в печи вавилонстей, укрепи и тебе, мучениче всеславне, воспевающего: отец и наш Боже, благословен еси.

Богородичен: **Всемиловитая** Владычице Богородице, милостию Твоею заступи и помилуй всех, Сыну Твоему хвалу приносящих и умиленно зовущих: отец и наш Боже, благословен еси.

Песнь 8.

Ирмос: *Отроки благочестивыя в пеци Рождество Богородичо спасло есть, тогда убо образуемое: ныне же действуемое, вселенную всю воздвизает пети Тебе: Господа пойте дела и превозносите Его во вся веки.*

Светом молитв твоих освети всех, мольбы тебе днесь приносящих и единого Дивного во святых Своих Бога воспевающих, и превозносящих Его во вся веки.

Еретическая шатания утоли и расколов плевелы исторгни молитвами твоими, Агафангеле преславне, и мир недвижимый Церкви подаждь предстательством твоим, да воспевающе, песнь Богу возсылаем, хваляще и благословяще Его во вся веки.

Страдальче и мучениче Агафангеле, похвало Анкиры и вселенная украшение, Церкви Христовы столпе и веры сокровище неоскудеваемое, образе благочестия и обличителю неверных, ходатайствы твоими от всякаго зла сохрани нас, да под кровом молитв твоих Господа славим и превозносим во вся веки.

Богородичен: **Любовию** Твоею, Владычице Всепетая, защити люди Твоя, да Покровом Твоим осеняеми, Господа славим, поим, благословим и превозносим во вся веки.

Песнь 9.

Ирмос: *Всяк земнородный да възграется Духом просвещаемь, да торжествует же безплотных умов естество, почитающее священное торжество Богоматере, и да вопиет: радуйся всеблаженная Богородице, чистая Приснодево.*

Ангелу соименне благому, ангельски пожил еси на земли и подвигом твоим удивил еси ангельския воинства и со ангелы ныне Троицу прославляеши, Агафангеле преславне и досточестне, моли Христа Бога спастися душам нашим.

Великому учителю твоему, Клименту достославному, предтекл еси, Агафангеле, и сего в мучениях предварив, во славе сретил еси, с ним же моли Господа, да во исповедании правом утвердит нас и спасение дарует душам нашим.

Необоримь прилоги вражиими явился еси, всеславне мучениче Агафангеле, и несокрушимь

многообразными мученьми, со апостолом глаголюще: все могу о укрепляющем мя Иисусе, Егоже моли, да спасет души наша.

Богородичен: **Едина** Чистая и Благословенная Дево Богородице, теплейшая заступница мира хладнаго, милостию Твоею заступи и помилуй всех нас.

Светилен, глас 2:

Светом Лица Божия озарено имеяй сердце свое, предстал еси нечестивому судищу и Христа исповедал еси безбоязненно, светом молитв твоих освети и нас, память твою воспевающих.

Слава, И ныне, Богородичен, глас тойже:

Во свете Непрístupнем Живущаго родила еси плотию Христа Живодавца, Дево Всепетая, Иже освещает и просвещает всякаго человека, грядущаго в мир и от тли избавляет души наша.

На хвалитех стихиры, глас 8.

Подобен: О, преславнаго чудесе:

О, преславнаго чудесе! / о явления силы Божия! / Кровь мученика семенем веры является, / и сокрушаются демонския дерзости, / нечестивых царствие разрушается, / и

Церковь Христова светло торжествует, / и
люди православнии память совершают
Агафангела мученика преславнаго, / твердаго
исповедника // и молитвенника о душах наших.

О, преславнаго чудесе! / Сила Божия, присно
в немощи человеческой совершаемая, / явлена
бысть о тебе, Агафангеле всеблаженне, / сиею бо
вооружен боголепно, / посрамил еси державу
сопротивнаго / и стерл еси вся немощныя
демонския дерзости, / сего ради восприял еси
венец нетления, / и на Небеси Престолу Божию
предстояще, // молишия прилежно о всех нас.

О, преславнаго чудесе! / Злочестия тьма и
безбожия / не возмогла есть свет Христов
сокрыти / и сокрушити крепость мучеников, /
от них же един светло воспевається / Агафангел
блаженный, страстоносец изрядный / и
исповедник добропобедный, // и молитвенник
дерзновенный о душах наших.

О, преславнаго чудесе! / Двадесят и осемь лет
в темнице сокровенный, / яко солнце
нехзаходимое и светило светоносное / ко
страстем исходит / и по многоразличным мукам
во главу усечение приемлет, / и ко Престолу
Божью восходит, яко светоносец, / знамение
победы в деснице имущий / и, яко сокровищем,

многими ранами украшенный, // Агафангел мученик преславный и молитвенник дерзновенный о душах наших.

Слава, глас 2:

Лицы ангельстии / подвиги твоя воспевают / и святых всех чини радуются, / людие же христоименитии веселия исполняются, / нового молитвенника и предстателя обретше тя, / Агафангеле досточудне, / моли Христа Бога // спастися душам нашим.

И ныне, Богородичен: Препоблагословенна еси:

